

# Recordon la jent che à viventà la cultura ladina

*Te chisc dis l é l cedeàn de desvaliva persones che à lascià n segn emportant  
te la cultura ladina de Fascia e Moena e che volon recordèr*

L é giust e benfat tegnir empeà la lumes su la persones che te sia vita les à lascià na pedia fona e emportanta per sia comunanza. L liber di personajes che à dat n contribut emportant a la cultura de noscia val ne met dant te chest temp del an anter la fin de jené e la metà de firé l cedeàn de n muie de chesta persones, che l'Union di Ladins de Fascia e l'Istitut Cultural Ladin vel recordèr.

Ai 28 de jené l é l cedeàn de la mort de doi persones de nonzech. La pruma l é P. Giosef Freinademetz, missionarie badiot e prum sènt ladin, mort del 1908, che en vender passà l é stat recordà con na messa te gejia de Poza ence con cianties e oracions per ladin. L auter l é Ermanno Zanoner del Gabana, en èrt Luigi Canori, mort del 1991 e recordà dal an passà per l 30eistem

cedean con desvaliva scomenzadives; l'ultima de chestes, aldò de na colaborazion anter l'Union di Ladins de Fascia e l'Istitut Cultural Ladin, l é l regoi de scric, poejies e cianzons del Canori rencurà dal conseier de l'UdL e jà diretor del ICL Fabio Chiocchetti: na opera emportanta che jirà en stampa te curt temp.

De autra persones de cultura ne à lascià te chest temp del an. Ai 30 de jené se n jia Luciano Jellici del Garber (1928-2006) autor de poejies de gran valor che à portà na revolucion stilistica e de contegnù e che é states publichèdes dal Grop Ladin da Moena tel liber «Raisc desmenteada» e fates cognoscer ence dal grop Marascogn che l n à metù desvalives en musega. Ai 5 de firé l calandèr de la recordanzes segna la mort de Simon Soraperra de

Giulio (1912-1987) e per l recordèr, a 35 egn da sia mort e tel 110° cedeàn da sia nasciuda, l'Union di Ladins à endrezà na bela scomenzadiva che podede lejer chiò de sot.

Ai 6 de firé fenìa sie temp su la tera l maester de scola e de vita Simonin Chiocchetti Maza (1915-2010), fondator e prum animator per n muie de egn del Grop Ladin e del boletin «Nosha Jent». Ai 9 de firé se n jia Rita Rossi del Baila da Soraga (1926-2015) che per duta la vita se à dat ju per rencurèr la tradizions, la cultura, l lengaz e la fe ritèdes dai aves, e l di do, ai 10 de firé, l é segnà la mort de n auter moenat, Valentino dell'Antonio (1909-1982), più cognosciù desche Tinoto Monech. Chest an l é i 40 egn giusc da sia departida e per valorisèr l'opera de

chest gran poet l'Union di Ladins de Fascia à metù a jir n'autra azion: ence de chesta podede lejer sun chesta piata.

Chisc dis ampò no l é demò aniversaries de mort, ma ence l cedeàn de na nasciuda emportanta: ai 11 de firé del 1920 defat nascea P. Frumenzio Ghetta, pera miliara de la storia e de la cultura de noscia val, e apontin ai 11 de firé ence chest an l'Istitut Cultural Ladin porta inant na scomenzadiva en si onor.

Vèlch de più su la biografia de duta chesta persones (e de n muie de autres) é da poder troèr sui desvalives numeres del Almanach de l'Union di Ladins de Fascia, che ruarà prest fora con sia edizion del prum cedeàn toron: la numer 10.

*Lucia Gross*